

# ESITAPU SIOKHURANGA SIA MUSA ESILANGWA OKHUCHIAKA

## Okhulongwa khwesibala nende okhwabandu

**1** <sup>1</sup> Mukhuchiaka Nyasaye yalonga likulu nende esibala.  
<sup>2</sup> Esibala sisiaali nende omufwano tawe ma nisiba butswa esikhaya. Olutungu olwafunikha esibala lwali nesiilima esikali, nobunyalu bwa Nyasaye bwayeyema ikulu khumaatsi. <sup>3</sup> Ma Nyasaye naboola, “Obulafu bubebo”, nobulafu nibubaho. <sup>4</sup> Nyasaye nayanzisibwa nende obulafu. Ma niyabukhania obulafu okhurula khusiilima. <sup>5</sup> Nalanga obulafu “Om’basu” nesiilima nasalanga “Obutukhu.” Omukolooba nikubira ma omukamba nikwoola. Niliba litukhu liokhuranga.

6 Nyasaye naboola, “Esilama esikali sibe hakari wamaatsi, siabukhanie amaatsi mutsimbeka tsibili.” <sup>7</sup> Ma Nyasaye nalomba esilama esibambukhu, niyabukhania amaatsi akali hasi wasio nende akali ikulu wasio. Ne nikelkhola mbwo. <sup>8</sup> Nakulikha esilama yisio “Likulu.” Omukolooba nikubira ma omukamba nikwoola. Niliba litukhu liakhobili.

9 Nyasaye naboola, “Amaatsi akali hasi welikulu ketse halala khe liloba lilolekhe”, nikelkhola mbwo. <sup>10</sup> Nakulikha liloba “Esibala” namaatsi akali niketsele hal’la nakakulikha “Inyanza.” Ma Nyasaye nayanzisibwa n’nabio. <sup>11</sup> Nyasaye naboola, “Esibala simelemwo obunyaasi, emimela chiokhubalusia tsimwo nende emisaala chiamatunde” – ne nikelkhola mbwo. <sup>12</sup> Esibala siamala nisimelamwo obunyaasi nende emimela tsimbila etsiabukhan’ne, ne Nyasaye nayanzisibwa n’nabio. <sup>13</sup> Omukolooba nikubira ma omukamba nikwoola. Niliba litukhu liakhataru.

14 Nyasaye naboola, “Ebiakhilo bibebo khwikulu okhbukhania om’basu okhurula khubutukhu. Ma bibe esimanyilo sietsinyinga, nende amatukhu nende emihika. <sup>15</sup> Nabiakhenje khwikulu okhuhaana obulafu khusibala.” Ne nikelkhola mbwo. <sup>16</sup> Ma Nyasaye nalomba ebiakhilo b’bili; eliiba liruchenje m’basu, nomwesi kuruchenje butukhu, ma khandi nalomba tsinyininyini. <sup>17</sup> Nyasaye nabira khwikulu mbu biakhenje

khusibala,<sup>18</sup> nibiruka om'basu nende obutukhu ma nende okhwabukhania obulafu okhurula khusiilima. Nyasaye nayanziisibwa n'nabio.<sup>19</sup> Omukolooba nikubira ma omukamba nikwoola. Niliba litukhu liakhane.

20 Nyasaye naboola, "M'maatsi bitsulemwo ebilonje ebili nobulamu, namanyonyi nako kapulukhenje ikulu wesibala mumiiya."<sup>21</sup> Ma Nyasaye nalomba emisutse emikhongo nende ebindu bindi biosi ebilamu ebimenyele m'maatsi, nende amanyonyi kosi. Ma Nyasaye nayanziisibwa n'nabio.<sup>22</sup> Nabi-laamila tsikhabi naboola, "Mwibulane nimwinjiha, mwitsule m'maatsi kali munyanza, namanyonyi nako ketsule musibala."<sup>23</sup> Omukolooba nikubira momukamba nikwoola. Niliba litukhu liakharano.

24 Nyasaye naboola, "Esibala sibemwo tsisololo etsiabukhan'ne, etsiobulamu nende biosi ebimoolanga." Nikekhola mbwo.<sup>25</sup> Ma Nyasaye nalomba tsisololo tsiosi etsiom'bulimo nende etsirukwanga ma nende biosi ebimoolanga hasi. Nyasaye nayanziisibwa n'nabio.

26 Nyasaye naboola, "Khulombe omundu mukhufwana khwefwe, mwikondo liefwe. Bakhabe nende obunyali khutsisutse, amanyonyi, nende tsisololo tsiosi etsiom'bulimo nende etsirukwanga ma nende biosi ebimoolanga hasi."<sup>27</sup> Ma Nyasaye nalonga omundu mukhufwana khukhwe omwene. Yabalonga omusaatsa nende omukhasi.<sup>28</sup> Ma Nyasaye nabalaamila ikhabi, nababool'la, "Mwibulane, mwinihi, mwitsule musibala ma musiruche. Khandi mube nobunyali khutsisutse tsiosi etsili mutsinyanza, nende amanyonyi ma nende tsisololo tsiosi.<sup>29</sup> Muheeye obunyali khumimela chiosi echialusianga tsimwo nende emisaala chiosi echili khusibala echiebiamo biachio bilimwo tsimwo, nabibetsenje ebiakhulia bienywe.<sup>30</sup> Ne khutsisolo tsiosi, nende amanyonyi mal'le okhuhaana emimela chiamasaafu nende obulimo, bibe ebiakhulia." Nikekhola mbwo.<sup>31</sup> Nyasaye nahenga ebindu biosi ebiayali nalombele ma nasangasibwa n'nabio biosi. Omukolooba nikubira ma omukamba nikwoola. Niliba litukhu liakhosasaba.

**2** <sup>1</sup> Kho likulu nende esibala biamalwa nende ebiali nibilombeywemwo biosi. <sup>2</sup> Khwitukhu liakhane-na-khataru Nyasaye yamala emilimochie ma nahuluukha. <sup>3</sup> Yamala na-laamila litukhu liakhane-na-khataru ikhabi ma naliahula singa lichomekhe, sichila nilio eliyahuluukhilamwo khumilimo chiobulonji. <sup>4</sup> Ma nimbwo likulu nende esibala bialongwa.

## Omukunda kwa Edeni

Khwitukhu elia OMWAMI Nyasaye yalomba esibala nende likulu,<sup>5</sup> emimela chiosi sichialikhwoho tawe kata tsimwo sitsianala okhumela tawe sichila yali nasili okhukwisia ifula makhandi omundu siyaliho onyala okhulima liloba tawe,<sup>6</sup> nebutswa amaatsi kelifumbi karula hasi nikanyisia esibala.

7 MOMWAMI Nyasaye nabukula liloba okhurula hasi nalomba omundu okhurula khulio; ma nafuura emiya chiobulamu m'moolu kake, momundu naba omulamu.<sup>8</sup> OMWAMI Nyasaye naraaka omukunda mu Edeni, Ebukwe, ma naramwo omundu owayali nalonjele.<sup>9</sup> Yamesia khwiloba tsana siomusaala omulayi okwokhwama amatunde amalayi. Hakari womukunda kwaliho omusala kwobulamu nende omusaala okwokhuma-nyia amalayi nende amabi.

10 Omuchela kwarula mu Edeni okwokhusama omukunda ne kwakabukhan'namwo okhuba emichela chine.<sup>11</sup> Omuchela kwokhuranga kulangwa Pishoni, nikwo okwabotokhana esibala siosi esia Harila,<sup>12</sup> esilimwo omukasa omulayi, khandi amafura kesuswa indayi kaliyo nende oruchina rwobukusi obukali.<sup>13</sup> Omuchela kwakhabili ni Gihoni, nikwo okwabotokhana esibala sia Kushi.<sup>14</sup> Omuchela kwakhataru ni Tigris, okubir'ranga ebukwe wa Asiria, ne omuchela kwakhane ni Yufurate.

15 OMWAMI Nyasaye yara omundu m'mukunda kwa Edeni khulwa okhulima nende okhukulinda.<sup>16</sup> Namubool'la, "Onyala okhulia khumatunde komusaala kwosi m'mukunda,<sup>17</sup> nebutswa orakhaliakhwo amatunde kokhumusaala kwokhuma-nya obulayi nende obubii tawe, litukhu liawakhaliakhwo wakhafwe."

18 OMWAMI Nyasaye naboola, "Sibuli obulayi omundu uyu okhuba yenyene tawe, namulombele omukhonyi oumukhoyele."<sup>19</sup> Ma nabukula liloba nałomba tsisoltsiosi nende amanyonyi, naleer'ra omundu uyo arole ameera kabikulikha. Eliira liosi eliomundu yakulikha buli sindu nilio eliali eliasio.<sup>20</sup> Omundu yamala nakulikha tsisoltsiosi ameera nende amanyonyi, nebutswa sibulaho khubio esiakhabeye singa omukhonyi oumukhoyele tawe.

21 OMWAMI Nyasaye yaheelesia omundu tsindoolo tsingali nolwa yali nakonanga Nyasaye nahiinia olubafu lulwe l'lala ma nakalusia inyama habundu tsana.

## OKHUCHIAKA 2, 3

22 Nalomba omukhasi okhurula khulubafu yilwo ma naleer'ra omundu.<sup>23</sup> Omundu naboola,

“Uno bulano nelikumba liokhumakumba kanje,  
inyama khutsinyama tsiom'bili kwanje.

Alalangwa omukhasi, sichila yahiinibwa khumusaatsa.”

24 Khulweyako omusaatsa alalekha samwana nende nyina, ahambaane nende omukhasiwe, babe om'bili mulala.<sup>25</sup> Ne omusaatsa uyo nende omukhasiwe, bombi bali esichechenye, nebutswa sibalolakhwo es'simba-murwe tawe.

### Okhukwa khwo mundu

**3** <sup>1</sup>Ne inzokha yali injesi okhuyomba tsinyama tsindi etsiom'bulimo etsia OMWAMI Nyasaye yalomba. Nereeza omukhasi, “Ni tooto mbu Nyasaye yam'bool’la mulekhe okhuliakhwo amatunde komusaala nalebe m'mukunda?”

2 Omukhasi nakalusia, “Khunyala okhulia amatunde kemisaala chiosi m'mukunda,<sup>3</sup> nikurali omusaala okuli hakari womukunda. Nyasaye yakhubool’la khurakhaliakhwo amatunde komusaala yikwo kata okhutila khukwo tawe, nikhuliakhwo khwakhafwa.”

4 Inzokha nebool’la omukhasi, “Simunyala okhufwa tawe.<sup>5</sup> Nyasaye yaboolambwo sichila wamanya mbu nimuliakhwo netsimoni tsienywe tsikukha nemuba singa Nyasaye ma mumanye amalayi nende amabi.”

6 Omukhasi uyo yalola omusaala yikwo nikuli omulayi khandi amatunde nikali amalayi akokhulia, ma nikunyonya tsimoni tsitsie, khandi nalola bwakhaba obulayi okhuchetsihala. Yamala nanoka khwitunde liakwo nalia, khandi nahelesiakhwo omusaatsawe naye naliakhwo.<sup>7</sup> Olwabaliakhwo ne tsimoni tsiabwe nitsikukha, nibamanya bali esichechenye, nibanaba amasafu khumikhuyu nibeboha mubisienje.

8 Khumukolooba kwelitukhu yilio bahul’la OMWAMI Nyasaye nachendanga m'mukunda, ne nibevisa m'musaala.<sup>9</sup> OMWAMI Nyasaye nalanga Adamu, namureeba, “Oli heena?”<sup>10</sup> Naye nakalusia, “Mbuliiye nochendanga m'mukunda ma niria, nindebissa sichila ndi esiechenye.”

<sup>11</sup> Nyasaye namureeba, “Niwiina okhubooleye oli esiechenye? Oliye litunde liandakhukaya okhulia nohomba?”<sup>12</sup> Adamu nakalusia, “Omukhasi wawaimbeye khumenye n'naye niye ounbelesisie litunde ma nase nindia.”

13 OMWAMI Nyasaye nareeba omukhasi, “Esichil’le

nokholambwo nisiina?" Naye nakalusia, "Inzokha niyo eyaingat'te ma nindiakhwo."

### **Nyasaye yakhalachila omundu esiina**

14 OMWAMI Nyasaye nabool'la inzokha, "Sichila okhol'le akeene yaka oli musilaamo siobubi esianasikhwabukhanie khutsisolo tsindi tsiosi. Nomoolenje nende indayo khandi nolitsenje olukuukhi amatukhu kobulamu bubwo bwosi.<sup>15</sup> Khandi nare obusuku hakariwo nende omundu mukhasi, khandi hakari wolwibulo lulwo nende olulwe. Olwibulo lulwe lwakhatuye omurwekwo nawe wakhalumache es'sisilosie."

16 Ne nabool'la omukhasi, "Ndakhameete obunyakhanibwo khweinumwa. Obwekombibwo bwakhabeetsenje khumusaa-tsawo, ne yakhakhuruchenje." <sup>17</sup> Ne nabool'la Adamu, "Sichila ohuliye amang'ana komukhasiwo ma nolia litunde liomusaala kwandakhukaya okhuliakhwo, liloba lilaamilwe khulweibe. Notiyenje khulio netsingufu mubulamu bubwo bwosi khulwa okhunyoola esiolia. <sup>18</sup> Liakhakhuleer're amarakalu nende eminyenya, nawe nolitsenje tsifwa tsiom'mukunda. <sup>19</sup> Khulwoluchesi lulwo nonyolenje esiolia okhurula khwiloba eliawalombwakhwo. Walombwa okhurula khulukuukhi khandi wakhakalukhe khulukuukhi."

20 Adamu nakulikha omukhasiwe Hawa, sichila niye nyina

abandu bosi. <sup>21</sup> Ma OMWAMI Nyasaye nalomba tsingubo okhurula khumaseelo ketsisolo nababiikha.

### **Adamu nende Hawa bahinibwa m'mukunda**

22 OMWAMI Nyasaye naboola, "Bulano omundu uno wekhol'le singa mulala khu ifwe, okhumanya obulayi nende obubii. Arakhahuchil'lwa okhubukulakhwo amatunde komusaala kwobulamu aliekhwo tawe, khase yakhahindila inziayo." <sup>23</sup> KhOMWAMI Nyasaye yamala namuhiiinia m'mukunda kwa Edeni mbu atsie alime liloba eliyahini-bwakhwo. <sup>24</sup> Khulubeka Iwebukwe Iwomukunda kwa Edeni Nyasaye yarayo "Abakerubi" nende olukanga Iwolumemo olwasukhananga tsimbeka tsiosi, khulwa okhulinda injila yokhutsia khumusaala kwobulamu.

Published by  
 The Bible Society of Kenya  
 P.O. BOX 72983  
 Nairobi

© The Bible Society of Kenya, 1990.  
 Illustrations by Horace Knowles.  
 © The British and Foreign Bible Society,  
 Swindon, England. 1954, 1967, 1972.

ISBN 9966-48-026-9  
 LUNYORE GENESIS 560P BSK 1M 1990